


## U SPOMEN ČEDOMILU ŠILIĆU



Dana, 21. oktobra 2010. godine poslije dužeg bolovanja je preminuo dr sc. Čedomil Šilić, naučni savjetnik Zemaljskog muzeja BiH u penziji, istraživač flore, član uredništva časopisa “Fondeko svijet”, učitelj, inspirator i prijatelj čitave plejade zaljubljenika u modrozeleni prostor prirode.

Dr Čedomil Šilić je rođen 1937. godine, u Sarajevu. Tu je završio osnovnu školu, a srednju šumarsku školu je pohađao u Banjoj Luci i Sarajevu. Još tada je bio zapažen od kolega i nastavnika po interesovanju za biljni svijet i izuzetnom daru crtača. Šumarski fakultet je završio 1963, a doktorsku disertaciju odbranio u Ljubljani, 1973. godine. Skoro čitav radni vijek je proveo u Prirodnjačkom odjelu Zemaljskog muzeja Bosne i Hercegovine, na istraživanju flore. Penzionisao se 1996. godine.

Objavio je više desetina naučnih, naučnopopularnih i stručnih knjiga i radova iz oblasti sistematike, horologije i ekologije biljaka i zaštite prirode. Iako je posljednjih godina zbog narušenog zdravlja bio spriječen da druguje sa planinama, ovaj div marljivosti i upornosti je, uprkos bolovima u leđima i nogama koji su i pri sjedenju postajali sve teži, fenomenalnom snagom volje grabio naprijed i darivao nam nova vrijedna ostvarenja.

Posebno je značajan doprinos dr Čedomila Šilića popularizaciji biljnog diverziteta južnoslovenskih zemalja. Još 1969. godine on pokreće ediciju “Priroda Jugoslavije”, u okviru koje su objavljene četiri njegove knjige: **Atlas drveća i grmlja** (1973), **Šumske zeljaste biljke** (1977), **Endemične biljke** (1984) i **Ukrasno drveće i grmlje** (1984). U novije vrijeme taj vid svog stvaralačkog opusa je nastavio sa dvije knjige u ediciji “Priroda Bosne i Hercegovine”: **Endemične i rijetke biljke Parka prirode Blidinje** (2002) i **Atlas dendroflora (drveće i grmlje) Bosne i Hercegovine** (2006) te knjigom **Botanička bašta planinske flore Crne Gore Kolašin, Dulovine** (2006). Odličan poznavalac biljnog svijeta, izvanredan fotograf i minuciozni esteta, on je ovim knjigama stvorio uzore naučnopopularne literature koji će dugo ostati

nezaobilazni priručnici za generacije istraživača i ljubitelja prirode. Bez pretenzije da ovom prilikom navodimo širi popis radova Čedomila Šilića, neizostavno treba pomenuti njegove naučnoistraživačke radove: **Prilog poznavanju dendroflora Banje Luke i okoline (1973)**, **Monografija rodova *Satureja* L., *Calamintha* Miller, *Micromeria* Bentham, *Acinos* Miller i *Clinopodium* L. u flori Jugoslavije (1977)** i **Spisak biljnih vrsta (Pteridophyta i Spermatophyta) za Crvenu knjigu Bosne i Hercegovine (1995)**. Posljednjim radom je postavljen temelj dugoročne i sveobuhvatne aktivnosti na istraživanju i zaštiti rijetkih i ugroženih biljnih vrsta u našoj zemlji.

Kao ličnost Čedomil Šilić je bio skroman i nenametljiv, strpljiv sagovornik, uvijek spreman da posavjetuje i pomogne. Za uzvrat uživao je poštovanje kolega i poznanika i bio okružen ljubavlju i pažnjom životne saputnice supruge Dobrile, sinova Igora i Daria i unuka Davora.

Posljedne djelo dr Čedomila Šilića je “Dendrologija”, udžbenik za srednje šumarske škole. U ovu, kao i sve prethodne knjige, uložio je maksimum truda, ljubavi i znanja, da udžbenik, tekstom i likovnim priložima, na najbolji način posluži svrsi. Nažalost, nije dočekao njeno publikovanje. Ostaje amanet šumarskoj struci i nadležnima u sferi obrazovanja da i ova knjiga stigne do onih kojima je namijenjena i potrebna.

Za sve što je uradio tokom plodnog stvaralačkog života i njegov ljudski lik, neka je velika hvala našem kolegi, prijatelju i drugu Čedomilu Šiliću. Vječna mu slava! Neka njegov duh, oslobođen od ovozemaljskih bolova, vječno lebdi nad veličanstvenim beskrajem Blidinja, Prenja, Zelengore i drugih planinskih krajolika koje je on, kao malo ko, poznao i volio!

Dr Vojin Bucalo, vanredni profesor